

189 fazi la caza il Zuoba predito, et sia tajato la testa a li porchi per li scudieri dil Principe, li quali poi siano dati a li presonieri justa el solito; sichè *de cætero* più non si farà. La causa di haver messo adesso questa parte fo che questo Zuoba di la caza essendo el Legato episcopo di Puola in Colegio, si levò do Consieri per andar al Proprio a dar la sententia, et el Legato domandò dove andavano. Il Principe, li disse dove. Lui se la rise molto; sichè terminono di meter la parte de levar tal consuetudine, e cussi è stà posto.

Et nota: *In libro Pactorum 2.º* apar in certo pacto fato tra el Doxe di Venexia e il comun e il Patriarcha di Aquileja, qual acordo fu fato in Venexia in l'hòspedal di Santa Maria di Crosechieri dil 1222, *die 8 exeunte Junio*, et fo confirmà, qual era prima dil 1156 a tempo di missier Vidal Michiel doxe 2º, apar ivi in carte 21, et poi a carte 35 apar cussi *1254, 7 Aprilis exeunte mense, et antedictus dominus Patriarcha dare debet Ducatui Veneciarum XII panes quorum quilibet esse debet unius stacii de cellario domini Patriarchæ, et XII porcos omni anno, et suis expensis dictos 12 panes et 12 porcos ipse dominus Patriarcha mittere debet usque ad palatium domini Ducis Veneciarum*. Et poi dil 1420 si ave la Patria di Friul, et la Signoria tolse lei a dar per l'officio di le Raxon vechie dicto pan et porzi, e cussi danno; ma si soleva dar zozoli a li zentilhomeni che el Doxe comprava altri porzi e mandava; ma soto questo Doxe non si dà più.

*Item*, con la Zonta introno sopra certi processi di rebellion di Malchiavelli vicentini, intervenendo quelli da Porto, quali è necessari *videlicet* volendo expedir questi vicentini Zechini, è in preson. Et non fo compito di lezer fin hore 24.

Fo leto una *letera di Franza, di l'Orator nostro*, drizata a li Cai di X.

Se intese, al tardi, el Doxe star ben, *adeo* quelli di Palazzo jubila.

*A dì 8*. La matina, se intese el Doxe aver auto bona note; ma da poi disnar li ritornò certa doja, e pur à la febre.

Veneno li oratori di Padoa in contraditorio con li oratori dil Polesene intervenendo.

*Da Roma, fo letere dil Minio orator nostro, di 3, qual manda letere di le galie di Barbaria dil Capitanio, da Tunis, di 7 Fevver*. Come ivi hanno ben contratato per più di ducati 60 milia. Scrive colouqui auti col Papa, et altro non da conto.

*Da Napoli, dil Dedo secretario*. Come el

signor Fabricio Colona stava a l'usato; ma *dies sui erunt parvi* etc.

Da poi disnar, fo Consejo di X con la Zonta, et leto li processi per expedir li Zechini, et non compito.

*A dì 9 Marzo*. La matina, se intese el Doxe star a l'usato; et reduto el Colejo, fo leto *letere di sier Francesco Contarini capitano di le galie di Barbaria, date a la Goleta di Tunis a dì 7 Fevver*, venute per via di Sicilia a Roma, et l'Orator le manda de qui. Scrive el suo partir di Trapano a dì 21 Dezembrio, dove feze nolizado per via di . . . con mori da Tunis in condurli con sue robe per la Barbaria etc. in doble 1000; et poi zonti a Tunis ivi fo contratato benissimo; et come per le private se intese, 40 milia doble col Re et 20 milia con mori. Et vedendo mori far cargar le robe sue etc. su le galie, li Patroni non voleano, *adeo* voleano farli garbuio per haver dopio nolo; et sopra questo esso Capitanio carga molto li soi Patroni sier Anzolo Justinian di sier Alvixe, et sier Piero Donado qu. sier Bortolo, qu. sier Antonio el cavalier. Et come, visto un protesto li fo fato a lui Capitanio e Patroni per el Re, terminò ditti Patroni dovesseno atender al nolizado fato e lassar cargar le robe. Et sopra questo carga molto ditti Patroni, come *etiam* zonto sarà di qui referirà. Scrive aver nova che 'l corsaro turco, che con le fuste ussi l'anno passato, par sia a Zerbi et ben in ordene di legni, et è per ussir fuora; pertanto si atendi a far provision per segurtà de dite galie etc.

Da poi disnar, fo Consejo di X con la Zonta; ma non andò li Savii, et fo cerchè li processi di Cechini etc., et non fo expediti; et li Savii alditeno li oratori di Brexa cercha el raynes per cavallo.

*A dì 10*. La matina, se intese el Doxe a l'usato va scorendo. Veneno li 6 oratori veronesi, qual fo licentiat, tornaseno a casa; sichè quelli dil contà non hanno optenuto nulla per adesso.

Da poi disnar, fo Pregadi per far li Savii ai ordeni, atento sier Marin Zorzi dotor, electo podestà a Padoa e consier, Luni ensirà di la bancha.

*Di Roma, fo leto le letere di sier Marco Minio, orator nostro, di 3*. Colouqui auti col Papa in caso il re di Romani volesse venir in Italia a tuor la corona, *ut in litteris*. Et scrive dito Orator, licet el Papa digi cussi, tien che 'l trati con dito Re qualeossa ovvero segui la praticia principiata, ovvero trati novi acordi.

*Da Milan, dil Caroldo*. Come la marchesana vechia di Mantoa ha scritto a monsignor di Telegni,